



نشكوك
ورطوط

أبونا داود لمعي

هل احنا كدا كدا وارثين السما؟

السؤال

+ سؤال متعلق بخلاص النفس وعقيدتنا وإيماننا؛

- سمعت كلام كثير عن موضوع أنت وارث فاعمل، ولا هي أعمل فترث؟

- يعنى هل احنا كدا كدا داخلين السما وبنجاهد بس عشان بنحب ربنا وبنرضيه؟ ودا هيحدد المكانة بتاعتنا فى السما؟ وغير كدا يبقى عدم إيمان بقوة خلاص دم المسيح؟

- هل دا يوافق أرثوذكسيتنا (تعليم الكنيسة الأرثوذكسية)، ولا احنا بنجرى فى سبق ومش عارفين فى الآخر ها نفوز ولا لا؟

دا سؤال مهم لأنه فى فرق بين تعليم الكنيسة وأى تعاليم أخرى،

تعليم الكنيسة هي تعليم الكتاب المقدس

+ لما نقول تعليم الكنيسة المقصود؛ تعليم الكتاب كما فهمته الكنيسة فى 2000 سنة،

(لأنه للأسف فى ناس لما بتسمع كلمة تعليم الكنيسة بتعتبر الكنيسة جبهة والإنجيل جبهة، وبالتالي بتشكك فى أن تعليم الكنيسة مستقيم)،

+ كل تعليم الكنيسة كتابى وإنجيلى، والإنجيل يفرض نفسه على الكنيسة، والكنيسة تتبع الإنجيل وعايشة بروح الإنجيل فى كل شىء.

- القديس أغسطينوس قال؛ أنا مقدرش أفهم الإنجيل بره الكنيسة.

+ الكنيسة هى اللى سلمتنا الإنجيل. هى اللى قالت لنا إن الأسفار دى اللى ربنا أداها لنا، وسلمتنا مع الإنجيل تفسير الإنجيل.

أزاي الكنيسة سلمتنا دا؟

+ الكنيسة بطقسها .. بتاريخها .. بحياة آباءها .. بكتابتهم، قالت لنا كل حاجة فى الإنجيل مقصود بيها إيه، عشان منجيش بعد 2000 سنة نفسر براحتنا ونطلع بأفكار بحريتنا ونقول الإنجيل قال.

- ماهو الإنجيل قال أيوه؛ لكن قال نصف المعنى، والنصف التانى أنت ممكن تاخده فى إتجاه، وواحد تانى ياخده فى إتجاه آخر، لكن الإتجاه الأصلى هو اللى عاشته الكنيسة .. وقالته الكنيسة .. وأختبروه الآباء،

- وعندنا النصوص فى مخطوطات بلا حدود، 400 سنة من ثروة الكنيسة فى تفسير الكتاب المقدس وأيضا من حياة الآباء.

+ يعنى مثلا مفهوم زى اللى فى السؤال اللى بنناقشه بتاع أنا وارث ها أعمل أعمال صالحة؟ ولا أنا بعمل أعمال صالحة عشان أورث؟ اللى هى دور الأعمال فى خلاص الإنسان،

- ببساطة كدا، عندنا هنا رأيين ومنقدرش نجمل الصورة ونقول هما رأى واحد، هما رأيين وعكس بعض، ولا يمكن يكون الحق شىء وعكسه، لأن الحق هو حق،

✓ يعنى لو قلت إن الأعمال ضرورية للخلاص يبقى مينفعش أقول أن الأعمال غير ضرورية للخلاص،

✓ ولو قلت الأعمال لا قيمة لها فى الخلاص يبقى ما ينفعش أقول الأعمال لها قيمة فى الخلاص،

خلينا واضحين لأن فى بعض الناس تقول كله صح، ماينفعش كله صح لأنه مفهوم وعكسه ما يمشيش.

رأى الكتاب فى موضوع وارثى الملكوت

بداية؛ الإيمان ضرورة للخلاص

الكتاب المقدس ألح إلحاح شديد على الإيمان بداية، علشان نتفق على نقطة مشتركة،

"ولكن بدون إيمان لا يمكن إرضاءه" (عب 11 : 6)

الأعمال ضرورة للخلاص

"من آمن واعتمد خلص، ومن لم يؤمن يذنب" (مر 16 : 16)

الإعتماد دا نقدر نسميه عمل ولا لا؟ ليه مقالش من أمن خلص بس؟ المعمودية هى سر من أسرار الكنيسة بس فى عمل بيتعمل.

كدا احنا متفقين أن الإيمان بالمسيح له المجد المخلص؛ الإيمان بدم المسيح اللى يغفر الخطايا؛

- مفيش من غيره خلاص،

"وليس بأحد غيره الخلاص. لأن ليس اسم آخر تحت السماء، قد أعطي بين الناس، به ينبغي أن

نخلص" (أع 4 : 12)

- وإن هو باب السماء .. أنا هو الباب،

- وهو طريق الملكوت .. أنا هو الطريق،

- وهو الحياة،

كل دا متفقين عليه، لما يجى المسيح نفسه (اللى هو الطريق)، ويقول:

"إِنْ لَمْ تُتُوبُوا فَجَمِيعُكُمْ كَذَلِكَ تَهْلِكُونَ" (لوقا 13 : 5)

إذاً **التوبة** ضرورة للخلاص،

+ واحد ها يقول طب والإيمان؟ ماأختلفناش التوبة عمل إيمان،

- تقولى التوبة دا شعور مش عمل! لا مش صح، لأن يوحنا المعمدان وهو الذى نادى بالتوبة قال؛

"أَفَاصْنَعُوا أُنْمَارًا تَلِيقًا بِالتُّوبَةِ" (مت 3 : 8)

وأبتدى يدى الناس اللى واقفين تداريب يعملوها، قال؛

مَنْ لَهُ تُوبَانٍ فَلْيُعْطِ مَنْ لَيْسَ لَهُ، وَمَنْ لَهُ طَعَامٌ فَلْيُفْعَلْ مَكْدًا (لوقا 3 : 11)

"لَا تَنْظِمُوا أَحَدًا، وَلَا تَشُوا بِأَحَدٍ، وَاكْتَفُوا بِعَلَائِفِكُمْ" (لوقا 3 : 14)

+ هى الأعمال دى مش توبة؟ والتوبة دى مش ضرورة للخلاص؟ وهل الكلام دا رأى ولا رأى الكنيسة؟

- دى تعاليم الآباء من 2000 سنة اللى عايشين عليها،

لما يقول النص أكثر من مرة فى الكتاب؛ إنه يأتى مع ملائكته مع قديسيه؛

"فَإِنَّ ابْنَ الْإِنْسَانِ سَوْفَ يَأْتِي فِي مَجْدٍ أَبِيهِ مَعَ مَلَائِكَتِهِ، وَحِينَئِذٍ يُجَازِي كُلَّ وَاحِدٍ حَسَبَ عَمَلِهِ."

(مت 16 : 27).

نص صريح وواضح وكل الكنيسة فهمته 2000 سنة، أن **الأعمال هى اللى تعبر عن إيماننا**، وبالتالي هتحدد

مصيرنا، أذاً الاعمال ضرورية جداً.

- لأنه لو عملنا أعمال شريرة يبقى معناها؛ سنجازى على العمل الشرير.

- ولو عملنا أعمال صالحة تتفق مع الإيمان المسيحى؛ نجازى بالحياة الأبدية.

يؤكد الفكرة دى كلام المسيح فى يوحنا 5 لما يقول؛

"28 لَا تَتَعَجَّبُوا مِنْ هَذَا، فَإِنَّهُ تَأْتِي سَاعَةٌ فِيهَا يَسْمَعُ جَمِيعُ الَّذِينَ فِي الْقُبُورِ صَوْتَهُ،

29 فَيُخْرِجُ الَّذِينَ فَعَلُوا الصَّالِحَاتِ إِلَى قِيَامَةِ الْحَيَاةِ، وَالَّذِينَ عَمَلُوا السَّيِّئَاتِ إِلَى قِيَامَةِ الدَّيْنُونَةِ." (يو 5 :

(29-28)

يعنى كل الناس هتقوم فى يوم القيامة، وكلمة **عَمَلُوا** هنا هى المحك اللى هيحكم دخولنا السما؛ سينات وصالحات،

فى واحد هيقول طب ماالكلام بيناقد نفسه، لأ مش بيناقد بيكمل، لأن احنا ها نعمل الصالحات لأننا آمننا بالمسيح، لكن متقولش إيمان بدون أعمال، لأن القديس يعقوب ذكرها بشكل صريح وقال:

"الإيمان بدون أعمال ميت" (يع 2 : 20)

وقال؛

"أنت لك إيمان، وأنا لى أعمال، أرنى إيمانك بدون أعمالك، وأنا أريك بأعمالي إيماني" (يع 2 : 18)

كل من يدعى أنه مؤمن ولا يعيش حياة صالحة؛ ولا يعمل أعمال تليق بالتوبة أو تليق بالإيمان، يبقى إيمانه باطل، ويبقى أعماله تحكم على مصيره الأبدى. منقدرش نجمل الصورة ونقلب الموازين، الكلام واضح وصريح، لما يقول مثلاً؛

"لأننا نحن عمله، مخلوقين في المسيح يسوع لأعمال صالحة، قد سبق الله فأعدّها لكي نسلك فيها"

(أف 2 : 10)

طب ما هو كل دى أعمال.

وصايا العهد الجديد تثبت أن الأعمال أساسية لورثة الملكوت

لو لم يكن للأعمال أى دور فى الخلاص؛ إيه لزوم كل وصايا العهد الجديد؟ احنا عندنا مئات وآلاف من التوصيات فى العهد الجديد؛ كلمة وصية معناها حاجة ها تتعمل، لما يقول:

- صلوا بلا أنقطاع , مش دا عمل؟

- وأشكروا فى كل حين,

- أحبوا أعداءكم,

- باركوا لاعنيكم,

- لاتدينوا,

كل دى أعمال، إيه قيمة الوصايا لو الأعمال مالهاش ضرورة؟ طب ماكان الكتاب أختصر كله إلى آمن فقط، ومفيش داعى للكلام الباقي دا كله،

ربنا يسوع من حرصه على الأعمال؛ بعد ما ختم الموعدة على الجبل قال عاوز أنبهكوا لحاجة مهمة أوى؛

- فى واحد ممكن يسمع ويصدق لكن ما يعملش .. دا زى الراجل اللى هيبنى بيت على الرملة.

- إنما اللى ها يسمع ويعمل دا اللى ها يبنى على الصخر.

يبقى الأعمال هى اللى ها تثبت استمرار حياتك الروحية , واستحقاقك للسما،

أول ما نقول الجملة دى فى ناس تقول؛

يعنى دم المسيح ملوش قيمة؟

+ احنا من غير دم المسيح, لو عملنا كل البر مش ها ندخل السما، ودم المسيح هو اللى فتح باب السما.

+ لكن دخول السما يحتاج إلى حياة صالحة .. يحتاج ببساطة إلى تبعية للمسيح،

- مجمل الأعمال الصالحة معناه واحد ماشى ورا ربنا, فربنا بيقولنى أمشى ورايا، يعنى صلى .. وحب

الناس .. وأهرب من الخطية .. وأسهر، كل التوصيات دى عبارة عن تبعية المسيح اللى آمنت بيه،

الطريق للسما يبدأ بإيمان .. ويحتاج لإيمان .. ويستمر بالإيمان, وفى نفس الخط طول الإيمان فيه أعمال.

+ فى متى 25 ربنا يسوع له المجد وهو بيتكلم عن دخول السما مجابش سيرة الإيمان خالص، هل دا معناه إن الإيمان مش مهم؟ طبعا لا، لكن قال ها يجى فى اليوم الأخير يقول للى علي اليمين؛

"ثُمَّ يَقُولُ الْمَلِكُ لِلَّذِينَ عَنْ يَمِينِهِ: تَعَالَوْا يَا مُبَارِكِي أَبِي، رَثُوا الْمَلَكُوتَ الْمَعَدَّ لَكُمْ مُنْذُ تَأْسِيسِ الْعَالَمِ." (مت 25 ، 34)

دول هايورثوا على أى أساس؟

"لَأَنِّي جُعْتُ فَاطْعَمْتُمُونِي. عَطِشْتُ فَسَقَيْتُمُونِي. كُنْتُ غَرِيبًا فَأَوَيْتُمُونِي. عُرْيَانًا فَكَسَوْتُمُونِي. مَرِيضًا فَزَرْتُمُونِي. مَحْبُوسًا فَأَتَيْتُمُ إِلَيَّ." (مت 25 : 35-36)

ما كل دى أعمال، أذا الأعمال حسمت الموقف؛ وختت دول مباركى أبى يرثون الملكوت.

ما خطورة الافتراض إن احنا ضامنين الملكوت؟

بتعبير أفضل؛ عندنا رجاء فى الملكوت، طبعا عايشين برجاء والرجاء لا يخزى، بالرجاء خلصنا؛ كلنا عايشين بنصلى وبنهرب من الغلط وبنحب الناس، وبنقع وبنقوم بالتوبة عشان عيننا على السما عاوزين نروح السما، فلنا رجاء،

"لَا تَخَفْ، أَيُّهَا الْقَطِيعُ الصَّغِيرُ، لَأَنَّ أَبَاكُمْ قَدْ سَرَّ أَنْ يُعْطِيَكُمْ الْمَلَكُوتَ." (لو 12 ، 36)

لكن مبنحبش كلمة ضمنا ليه؟

كلمة الضمان توحى نفسياً إنه لا لزوم لأى حاجة تانى،

مثال توضيحي

طالب ببيدكر، وبعدين نقوله مبروك ياسيدى أنت نجحت بتفوق، طب يذاكر ليه؟ يسهر ليه؟ يتعب ليه؟ بدال اتقال له أنت نجحت بتفوق، مفيش داعى يتعب ولا يسعى ولا يجاهد ولا يعمل أى حاجة.

طب هاتقولى يعنى ممكن يسقط؟ أه ممكن طبعاً، ممكن واحد مايوصلش السما بعد ما يكون آمن؟ طبعاً ممكن،

يهودا مثال توضيحي لإيمان ما يوصلش السما

والا أنت علوز تقول أن المسيح أختار يهوذا، ويهوذا مكاش مؤمن؟ هل أخطأ المسيح فى اختيار يهوذا؟ يعنى عنده آلاف المؤمنين بيه، لما أختار الأثنى عشر اللى هبيقوا قيادات الكنيسة مكنش عندهم إيمان؟ وإزاي يهوذا مكنش عنده إيمان؟ وهو عمل معجزات بإيديه؟ مش خرج شياطين زى بقية التلاميذ؟ وكان بينزل القرى ويعمل معجزات؟

إذا يهوذا كان عنده إيمان، لكنه أنحرف؛ حب الفلوس؛ خان المسيح؛ بطل يصلى، كل دا مجموعة أعمال ضيعته، وهلك يهوذا بعد ما كان مؤمناً،

متقدرش تقول أن الإيمان يجلى ضامن السما،

الإيمان يضعنى فى يد الله، والإيمان يضعنى فى الطريق

لكن الأعمال نعبير الإيمان، ولو الأعمال وقفت يبقى الإيمان وقف،

ولو الإيمان وقف يبقى طلعت بره الخط، ويبقى التعبير اللى قاله المسيح؛

□ "هذا الإنسان ابئداً يبني ولم يقدر أن يكمل" (لوقا 14 ، 30)

يبقى فى ناس كدا؛ أشهرهم يهوذا،

ديماس مثال لإيمان ما يوصلش السما

واحد زى ديماس اللى قال عنه بولس الرسول؛

"لأنّ ديماسَ قَدْ تَرَكَنِي إِذْ أَحَبَّ الْعَالَمَ الْحَاضِرَ وَذَهَبَ إِلَيَّ تَسْأَلُونِيكِي" (2تى4 : 10)

ساب الخدمة خالص أحب الدنيا،

كلام بولس عن بعض الناس فى فيلبى

لما يقول عن بعض الناس فى فيلبى؛ فى ناس لما بفتكرهم كنت بافتخر بيهم، دلوقتى بأبكى عليهم، طب ليه كان بيفتخر بيهم، هو مكانش عارف إنهم مؤمنين؟ هو يببكى عليهم؛

"لأنّ كَثِيرِينَ يَسِيرُونَ مِمَّنْ كُنْتُ أذْكُرُهُمْ لَكُمْ مِرَارًا، وَالآنَ أذْكُرُهُمْ أَيْضًا بِأَكْيَا، وَهُمْ أَعْدَاءُ صَلِيبِ الْمَسِيحِ،" (فى3 : 18)

فى ناس أبنتت ومكملتت،

رسالة العبرانيين كلها كتبت من أجل اللذين ارتدوا عن الإيمان،

الرسالة كلها مكتوبة لناس أمنت وبعدين كثير منهم أبتدا يرتد بسبب اضطهاد اليهود ليهم، عشان كذا الآية المشهورة اللى بتقول؛

"أَمَّا الْبَارُّ فَيُؤَلِّمُ الْإِيمَانَ يَحْيَا، وَإِنْ ارْتَدَّ لَا تُسَرِّ بِهِ نَفْسِي." (عب10 : 38)

☒ إذاً قد يهلك المؤمن إن ارتد.

☒ قد يهلك المؤمن إن لم يتب.

☒ قد يهلك المؤمن إن لم يتمسك بالنعمة.

☒ قد يهلك المؤمن أن لم يخضع للكتاب المقدس، والكتاب المقدس بيقول فى معمودية .. فى تناول .. فى

توبة مستمرة .. فى حفظ للوصية .. إذا الخضوع للكتاب هو طريق السما.

"فَقَطْ عَيْشُوا كَمَا يَحِقُّ لِإِنْجِيلِ الْمَسِيحِ، حَتَّى إِذَا جِئْتُ وَرَأَيْتُكُمْ، أَوْ كُنْتُ غَائِبًا أَسْمَعُ أُمُورَكُمْ أَنْتُمْ تَذُبُّونَ فِي رُوحٍ وَاحِدٍ، مُجَاهِدِينَ مَعًا بِنَفْسٍ وَاحِدَةٍ لِإِيمَانِ الْإِنْجِيلِ،" (فى 1 : 27)

طب ما هو ما يحق لإنجيل المسيح؟ احنا مبنقولش كلام من بره الإنجيل.

أحبائى عدو الخير ميحبش العمل الصالح، وعدو الخير فاهم مسار السما أكثر مننا، لأنه يؤمن ولكنه لا يحب الله، فممكن يعطلنا لما يوسع علينا الباب ويقول لنا الموضوع مش محتاج جهاد، ومش محتاج توبة ومش محتاج أعمال صالحة، ومش محتاج محبة، لا يبقى دا مش تعليم كتابى، يبقى كذا الباب بقى واسع والطريق رحب خالص، ودا عكس اللي قاله المسيح؛

"مَا أَضْيَقَ الْبَابَ وَأَكْرَبَ الطَّرِيقَ الَّذِي يُؤَدِّي إِلَى الْحَيَاةِ، وَقَلِيلُونَ هُمُ الَّذِينَ يَجِدُونَهُ" (مت 7 : 14)

"وَجَمِيعُ الَّذِينَ يُرِيدُونَ أَنْ يَعِيشُوا بِالتَّقْوَى فِي الْمَسِيحِ يَسُوعَ يُضْطَهُدُونَ" (2تى 3 : 12)

الخوف المقدس مطلوب

وقال فالنخف. يعنى الواحد يخاف على نفسه، (وهنا هو بيكلم مؤمنين)،

"فَلْنَخَفْ، أَنَّهُ مَعَ بَقَاءِ وَعَدْرِ الدُّخُولِ إِلَى رَاحَتِهِ، يُرَى أَحَدًا مِنْكُمْ أَنَّهُ قَدْ خَابَ مِنْهُ" (عب 4 : 1)

نخاف ليه؟

- لما أشوف فى التاريخ، شاوّل الملك بدأ مؤمنا وأنتهى هالكا .. ها أخاف.
 - لما أعرف أن يهوذا واحد من الأثنى عشر بدأ مؤمناً ورسولاً وأنتهى هالكا .. ها أخاف.
 - لما الاقى فى ناس أبتدت مع ربنا وبعدت عن الطريق .. ها أخاف.
- والخوف دا غلط؟ لأ دا خوف مقدس، الكتاب بيقول فلنخف .. الخوف دا أمر إلهى.

إيه رأيكم فى كلام المسيح لما بيقول؛

بَلْ أُرِيكُمْ مِمَّنْ تَخَافُونَ، خَافُوا مِنَ الَّذِي بَعْدَمَا يَقُولُ، لَهُ سُلْطَانٌ أَنْ يُلْقِيَ فِي جَهَنَّمَ نَعْمًا، أَقُولُ لَكُمْ: مِنْ هَذَا خَافُوا! (لوقا 5:12)

ليه الخوف؟ لئلا نتهاون، لئلا نعملش العمل الصالح، لئلا نستعثر بحياتنا،

الأعمال الصالحة ودم المسيح

- + للأسف كل ما نتكلم عن الأعمال الصالحة أو التوبة أو الأسرار على طول يطلع الكلام؛ ودم المسيح فين؟
- دم المسيح احنا فى كنيستنا مش بس بنؤمن بيه؛ احنا بناكله .. بنشربه .. احنا أكثر ناس تعشق دم المسيح .. احنا كل يوم على المذبح ابونا يقول الكاس الذى للعهد الجديد،
 - الكاس بالنسبة لى مش من 2000 سنة بتخيلها، دا قصاد عيني كل يوم على المذبح، ودم المسيح هو سر حياتى .. هو سر إيمانى .. هو اللى عشانه بموت من أجل المسيح.
 - إذا كنا ينظر إلينا أننا نقلل من شأن دم المسيح، دا احنا أكثر ناس مشغولين بدم المسيح؛ دا احنا كل شهوة قلبنا؛

✓ نجيب العالم كله يتوب ويتعمد عشان يلتصق بجسد الرب ودمه،

✓ عشان يتمتع بمذاق الجسد والدم .. المزاق الروحى،

✓ عشان يتمتع بالغفران المقدس فى الأسرار اللى عملها المسيح بإيديه.

"فَأَجَابَهُ سِمَعَانُ بُطْرُسُ: يَا رَبُّ، إِلَى مَنْ نَذْهَبُ؟ كَلَامُ الْحَيَاةِ الْأَبَدِيَّةِ عِنْدَكَ،" (يو 6 : 68) .

موضوع السؤال؛ دور الأعمال فى خلاص الإنسان وعلاقته بالإيمان بدم المسيح

بالتالى فكرة أن الواحد يقول أنا ورثت فهاأعمل, ولا هاأعمل عشان أورث؟ حبيبى؛ حسب إيماننا اللى أستلمناه, حسب تعليم الكتاب اللى عارفينه؛ إن:

☒ أحنا هنعمل عشان نورث، ودا مش معناه أن دم المسيح مالوش دور،

☒ أحنا بنعمل بعد ما أمنا بالدم .

☒ وبنعمل لأن دم المسيح بيدفعنا لهذا العمل،

☒ وبنعمل لأنه دا إثبات الإيمان .. دا تعبير الإيمان .. دا المحك اللى عليه يتحدد مصيرنا.

وكل دا كلام المسيح.

المراتب أو الدرجات فى السما

لما تيجى لقضية المراتب اللى فى السما؟ طبيعى الأعمال مش واحدة للكل، وما أكثر الأمثال اللى عبرت عن الجزء دا.

مثل الزارع والدرجات فى السما

فى أربع أنواع من الأراضى، والأرض الجيدة هى واحدة من الأربعة، يبقى فى 3 أنواع من الأراضى مش داخلين السما .. مش ها ينجحوا، وداخل الأرض الجيدة فى درجات؛ اللى هى فكرة ثلاثين وستين ومائة، إذا هنا الإعلان الكتابى واضح لنا،

رسالة بولس الأولى لكورونثوس والمكانة فى السما

"مَجْدُ الشَّمْسِ شَيْءٌ، وَمَجْدُ الْقَمَرِ آخَرُ، وَمَجْدُ النُّجُومِ آخَرُ. لَأَنَّ نَجْمًا يَمْتَازُ عَنِ نَجْمٍ فِي الْمَجْدِ."

(1كو15 ، 41)

انجيل معلمنا متى والدرجات فى السما

يقول؛

"فَإِنَّ ابْنَ الْإِنْسَانِ سَوْفَ يَأْتِي فِي مَجْدٍ أَبِيهِ مَعَ مَلَائِكَتِهِ، وَحِينَئِذٍ يُجَازِي كُلَّ وَاحِدٍ حَسَبَ عَمَلِهِ."
(مت 16 : 27)

يبقى طبيعى أتصور أن فى ناس أعمالها وحياتها وجهادها أكثر من غيرها. ولما يقول المسيح:

"لَا تَكْنُزُوا لَكُمْ كُنُوزًا عَلَى الْأَرْضِ حَيْثُ يُفْسِدُ السُّوسُ وَالصَّدَأُ، وَحَيْثُ يَنْقُبُ السَّارِقُونَ وَيَسْرِقُونَ. بَلْ
اَكْنُزُوا لَكُمْ كُنُوزًا فِي السَّمَاءِ، حَيْثُ لَا يُفْسِدُ سُوسٌ وَلَا صَدَأٌ، وَحَيْثُ لَا يَنْقُبُ سَارِقُونَ وَلَا يَسْرِقُونَ،"
(مت 6 : 19-20)

يبقى الكنز لوحد غير الكنز لوحد تانى فى السما، رصيد واحد غير رصيد التانى فى السما،

الأعمال غير منفصلة عن إيماننا بدم المسيح

لكن تانى مش بنقول أن هذه الأعمال منفصلة عن دم المسيح؛ مش بتقول أخلاق الناس تدخّل السما،

احنا مصيرين إن حياتنا نبدأ وتنتهى بالتصاقنا بالمسيح،

**المسيح اللى فينا وإيماننا الحقيقى يجعلنا نعيش حياة مقدسة، ونعمل أعمال صالحة،
ونلتصق بالمسيح فى تعاليمه وفى حياته، فى تفكيره وفى أعماله، فى صفاته وفى
خدمته،**

وبالتالى حياتنا كلها مجموعة أعمال نعبّر عما فى داخلنا من إيمان.

الفصل الشديد بين الإيمان والأعمال يلخبط الناس،

الناس البسيطة؛

- عايشة بإيمان وبتعمل حاجات حلوة ومش محتاجة حد يقول لها أعملوا حاجات حلوة.
- عندهم إيمان تلقانى سليم إن الأعمال هى تعبير الحب, وتعبير الإيمان اللى ضرورى نعيش فيه عشان ندخل السما،
- وإن احنا مش بندفع تمن السما بأعمالنا، هذا التفكير غير مطروح أساسا فى الموضوع.

"لَا تَكُفُّمْ قَدْ اشْتَرَيْتُمْ بِثَمَنٍ. فَمَجِدُوا اللَّهَ فِي أَجْسَادِكُمْ وَفِي أَزْوَاجِكُمْ الَّتِي هِيَ لِلَّهِ" (1كو6 ، 20)

لكن بدون الأعمال برده مفيش خلاص، القديس يعقوب أكد الحقيقة دى لما اتكلم عن راحاب وابونا ابراهيم؛

راحاب الزانية؛

آمنت أن هذا الشعب يتبع إلهاً لايقهر (ربنا له المجد)، وإنهم لازم ها يخذوا البلد، لو توقف إيمانها عند المرحلة دى كانت هلكت، إنما راحاب عملت إيه؟ بكلمات القديس يعقوب، أضافت الجاسوسين وغامرت وتعبت وعملت عمل من أجل هذا الإيمان اللى دفعها.

أبونا إبراهيم؛

"أَلَمْ يَتَّبِعْ إِبْرَاهِيمُ أَبُونَا بِالْأَعْمَالِ، إِذْ قَدَّمَ إِسْحَاقَ ابْنَهُ عَلَى الْمَذْبَحِ؟ فَتَدْرَى أَنَّ الْإِيمَانَ عَمَلٌ مَعَ أَعْمَالِهِ، وَبِالْأَعْمَالِ أَكْمَلَ الْإِيمَانَ، وَتَمَّ الْكِتَابُ الْقَائِلُ: فَأَمَّنَ إِبْرَاهِيمُ بِاللَّهِ فَحُسِبَ لَهُ بَرًّا وَدَعِيَ خَلِيلَ اللَّهِ" (يع 2 ،

(23-21)

مثل تانى أدهولنا القديس يعقوب، أبونا ابراهيم آمن فحسب له برا، لكن لما ربنا قاله هات اسحق قدمهولى ذبيحة؛ كان ممكن يقوله أنا مؤمن بيك يارب، طب وبعدين بقولك هات اسحق قدمهولى ذبيحة، قام خد اسحق ورفع السكينة وكاد أن يذبح ابنه، هو دا مش عمل؟

بالأعمال أكمل الإيمان، دا تعبير القديس يعقوب؛

"لَأَنَّهُ كَمَا أَنَّ الْجَسَدَ يَدُونَ رُوحَ مَيِّتٍ، هَكَذَا الْإِيمَانُ أَيْضًا يَدُونَ أَعْمَالَ مَيِّتٍ." (يع 2 : 26)

- أبونا أبراهيم بأعماله أكمل إيمانه.

- راحاب الزانية بأعمالها أكملت إيمانها .

- كل القديسين عبر العصور بأعمالهم شهدوا لإيمانهم وأكملوا إيمانهم.

والإيمان والأعمال دخلوهم السما،

+ لكن لما نفضل دا عن دا ونؤكد بس على الإيمان, كأننا بنشطب على كل حاجة؛ على الكنيسة .. وعلى المعمودية .. وعلى الميرون .. والتناول .. والتوبة المستمرة .. وعلى الاعتراف .. وعلى الخدمة .. وعلى الأمانة .. وعلى الصدق .. وعلى العطاء .. وعلى كل الحاجات الروحية دى.

ماهى دى كلها مجموعة أعمال، لو راجعنا كلام المسيح له المجد هنلاقى أن الحكاية واضحة, وإنه الأفضل نمشى على ما أستلمناه والخوف المقدس يمشى مع الرجاء.

التوازن الكنسى بين النعمة والخوف المقدس

+ لو حد قال؛ إنه مفيش خلاص لينا بدال الحكاية أعمال؛ وأحنا مش كويسين يبقى مش هاندخل السما!

- برده كذا لأ؛ أحنا نرجع تانى ونقول: أحنا ها ندخل بنعمة ربنا، لكن نعمة ربنا تنتظر مننا دور،

" لَأَنَّ كُلَّ مَنْ لَهُ يُعْطَى فَيَزِدَادُ، وَمَنْ لَيْسَ لَهُ فَالَّذِي عِنْدَهُ يُؤْخَذُ مِنْهُ" (مت 25 : 29)

فإذاً احنا لعاوزين نحذف يمين ولا نحذف شمال،

+ احنا عندنا توازن فى الفكر الكنسى بتاعنا، عندنا رجاء فى رحمة ربنا, واننا هاندخل السما محمولين على نعمة ربنا, عشانين فى رحمته ، ونقول بنعمة ربنا ها ندخل السما، بنقول أحنا مش خايفين لأن ربنا مش هايسمح لنا نهلك, لكن خايفين من نفسنا.

+ يبقى فى رجاء وفى خوف مقدس، فى رجاء فى رحمة ربنا؛ وفى أيضا خوف من الناس اللى مشيت مكملتش .. خوف من نفسى اللى بتدلع كل شوية .. خوف من عدو الخير، بس خوف مش زيادة لأنه ربنا معانا دايمًا، لكن معموله حساب.

"صَحُوا وَاسْهَرُوا. لَأَنَّ إِبْلِيسَ خَصْمَكُمْ كَأَسَدٍ زَائِرٍ، يَجُولُ مُلْتَمِسًا مَنْ يَبْتَلِعُهُ هُوَ." (1بط5 : 8)

دا بيكلم مؤمنين،

هو إبليس ممكن يبلع واحد مؤمن؟ ممكن طبعاً.

"فَقَاوِمُوهُ، رَاسِخِينَ فِي الْإِيمَانِ، عَالِمِينَ أَنَّ نَفْسَ هَذِهِ الْأَمْرِ تُجْرَى عَلَى إِخْوَتِكُمُ الَّذِينَ فِي الْعَالَمِ"

(1بط5 : 9)

فَقَاوِمُوهُ، ماهو دى أعمال . رَاسِخِينَ فِي الْإِيمَانِ، ماهو دى أعمال.

يبقى أحنا هنا لو صحينا وسهرنا وقاومنا إبليس ومسكنا فى ربنا؛ كل دى أعمال تسند إيماننا وتجهزنا لدخول السما.

تقليل شأن الأعمال ممكن يوصل إنه لا داعى للجهد

حاجة تانى مرتبطة بالحكاية دى؛ إنه مع تقليل شأن الأعمال فى خلاص الإنسان ممكن نوصل لإيه؛

- ممكن نوصل إن الصوم مالوش لازمة لأن الصوم عمل! فى الوقت اللى المسيح قال "متى صمتم ...";
طبعاً دا كلام عهد جديد والمسيح نفسه صام والكنيسة بتصوم، لكن بما أن الأعمال لادور لها فى الخلاص؛ يبقى مفيش داعى للصيام .. مفيش داعى للجهد عموماً أو الإجتهد، مايبقاش له قيمة ولا له معنى، لما بولس يقول؛

"لَمْ تُقَاوِمُوا بَعْدُ حَتَّى الدَّمِ مُجَاهِدِينَ ضِدَّ الخَطِيئَةِ،" (عب12 : 4)

إذا كلمة الجهاد دى موجودة، طب إيه قيمتها لو مكانش للأعمال ضرورة؟ الأخطر من كذا؛ دا ممكن الإنسان يعثر اللى حوالية ولا يعنيه الأمر،

السلوك بتدقيق هو أعمال

"فَانظُرُوا كَيْفَ تَسْلُكُونَ بِالنَّدَقِيقِ، لَا كَجُهْلَاءَ بَلْ كَحُكَمَاءَ، مُفْتَدِينَ الْوَقْتَ لِأَنَّ الْأَيَّامَ شَرِيرَةٌ." (اف 5 :

(16-15)

التدقيق والسلوك بتدقيق هو عبارة عن مجموعة أعمال، بدقق فى كلامى فى تصرفاتى فى شكلى فى علاقاتى، ليه الأعمال دى كلها؟ عشان دى كلها بتجهز للسما، يعنى ربنا بيجازى كل واحد حسبما يكون عمله،

الجزاء حسب العمل

لما يقول المسيح:

"لَأَنَّ مَنْ سَقَاكُمْ كَأْسَ مَاءٍ بِاسْمِي لِأَنَّكُمْ لِلْمَسِيحِ، فَالْحَقُّ أَقُولُ لَكُمْ إِنَّهُ لَا يُضِيغُ أَجْرَهُ." (مر 9 : 41)

هنا الأجر مقابل لكباية ميه، طب هل كباية المية وهى عمل بسيط؛ ليه أجر ومردود عند ربنا ولا لا؟ ليه أجر، يبقى الأعمال يوازىها أجر سماوى واضح.

لما يقول فى أشعياء ويكررها فى الرؤيا؛

"وَهَا أَنَا آتِي سَرِيعًا وَأُجْرَتِي مَعِي لِأَجَانِي كُلِّ وَاحِدٍ كَمَا يَكُونُ عَمَلُهُ" (رؤ 22 : 12)

يبقى مش متى والا كورنثوس بس اللى قالوا حكاية الجزاء حسب العمل، دى موجودة فى أشعياء وموجودة فى الرؤيا

ليس أحد مبررا والذي يحكم فى الآخر هو الله

لما بيقول بولس الرسول:

"وَأَمَّا أَنَا فَأَقُلُّ شَيْءٌ عِنْدِي أَنْ يُحْكَمَ فِيَّ مِنْكُمْ، أَوْ مِنْ يَوْمِ بَشَرٍ. بَلْ لَسْتُ أَحْكُمُ فِي نَفْسِي أَيْضًا. فَإِنِّي لَسْتُ أَشْعُرُ بِشَيْءٍ فِي ذَاتِي. لَكِنِّي لَسْتُ بِذَلِكَ مُبَرَّرًا. وَلَكِنَّ الَّذِي يَحْكُمُ فِيَّ هُوَ الرَّبُّ." (1كو4 : 3-4)

تصوروا القديس بولس فى عز خدمته يقول أنا مقدرش أعتبر نفسى بار ولا برئ؛ لأن الله لسة مجاش، أنا لست مبررا لغاية دلوقتى .. الَّذِي يَحْكُمُ فِيَّ هُوَ الرَّبُّ.

"إِذَا لَا تُحْكَمُوا فِي شَيْءٍ قَبْلَ الْوَقْتِ، حَتَّى يَأْتِيَ الرَّبُّ الَّذِي سَيُنِيرُ حَقَائِمَ الظُّلَامِ وَيُظَهِّرُ آرَاءَ الْقُلُوبِ. وَحِينَئِذٍ يَكُونُ الْمَدْحُ لِكُلِّ وَاحِدٍ مِنَ اللَّهِ" (1كو4 : 5)

يعنى اللى ها يحكم فى الآخر هو ربنا، لما واحد يحكم على نفسه أنه قد صار باراً وقد صار مؤمناً، وإنه لا يحتاج للأعمال طب فى الكتاب اللى بيقول: لَا تُحْكَمُوا فِي شَيْءٍ قَبْلَ الْوَقْتِ، وبيقول أنا لا أحكم حتى على نفسى؛ ولست بذلك مبررا؛ ولسة مستنى ربنا ووقت الحكم على.

ربنا يدينا نعمة إن احنا نعيش تسليم الكنيسة، وفكر الآباء كما فهموا الإنجيل وعاشوه، ونكمل فى الطريق المستقيم.

+إلهنا كل مجد وكرامة إلى الأبد آمين+

Anba Abraam Media

الخدمة محتاجة الكل والكل محتاج الخدمة